

In'otra strategia da proteger lingua e cultura (part 2)

DA ANDREA L. RASSEL,
SAN DIEGO – CALIFORNIA

■ **Nus Rumantschs e bleras autras minoritads linguisticas en l'Europa empruvain da maximar la visibilitad da nossa lingua e cultura per daven- tar pli preschents en la publicitad.**

Questa preschientscha promova d'ina vart la colliaziun enten il pievel rumantsch ch'è pulit eterogen e da l'otra vart vegnin nus percepids era da la maioritad da nossa terra. La finamira è da mussar tant a nus sezs sco a la maioritad che «La Rumantschia exista – la Rumantschia viva».

Tut in'otra strategia persequiteschan insaquants pievels indigens en ils Stadis Unids da l'America (SUA). Sco «Indians dal Pueblo» vegnan denominads tscherts pievels d'Indians u Americans nativs ch'èn da chasa en la part dal nord dal Mexico, en New Mexico, Arizona, Colorado ed en la California. Ils pievels ils pli enconuschents dals Indians dal Pueblo èn ils Hopi, ils Acoma ed ils Tano. Auter



ch'ils pievels nomads èn ils Indians dal Pueblo da vegl ennà sedentars.

Sper ils pievels relativamain gronds sco ils Hopi existan fin oz etnias fitg pitschnas en ils Pueblos. En in discurs cun *Jerry Cordova*, «National Tribal Coordinator» dal departament da l'interiur dals SUA e manader spiritual dals Indians dal Taos Pueblo, New Mexico,

hai jau vuli savair co in pievel da suletta- main 2800 persunas talmain exponì a la cultura «mainstream» fetschia da preser- var sia lingua e sia cultura. La resposta da Jerry è stada extremamain sorprendenta: «Char Andrea, quai na tradesch jau betg. Jau na ta raquaint betg co nus cultivain nossa lingua e nossa cultura ed en nagin cas ta raquaint jau insatge davart noss rits spirituals e nossa religiun.»

Questa reserva m'ha sorprendì extra- ordinariamain tant pli perquai che Jerry è ina persuna fitg averta ed eloquenta, che raquainta fitg bain sias istorgias ed anecdotes. I ha cuzzà varsaquants mu- ments en silenzi pulit penibel, fin che jau hai chapì che questa refusaziun da tradir infurmaziuns davart las mesiras da pro- tecziun è lur strategia da preservar lin- gua, cultura e religiun. Sin mia remartga che lur strategia funcziunna presumabla- main bain, sche jau mo resguardi m'atgna reacziun d'esser provotgà da sia tenuta uschè reclusa, tradescha Jerry Cordova tuttina insatge: «Ma guarda, i funcziunna ussa gia passa 500 onns.»